



Discurs cun ina coiffeusa ad Aceh/Sumatra. Dasperas las translaturas.

FOTOS MAD

«Magari èsi da bandunar l'atgna zona da confort»

Ils 17 da december 2021 rimna la Chadaina da Fortuna per uffants en Svizra ed en il mund. La vusch rumantscha da la Chadaina da Fortuna è Claudia Cathomen da Falera che maina la centrala da rimnada a Cuira dapi 16 onns. La FMR ha discurre cun la «Dunna Chadaina da Fortuna» da RTR.

MARTIN GABRIEL/FMR

Ella organisescha la centrala da Cuira per minga rimnada da daners. Ella è dentant era persvasa che la Chadaina da Fortuna haja ina fitg impurtanta funcziun. Che la Chadaina da Fortuna existia dapi 75 onns saja bain la cumprova, ha *Claudia Cathomen* ditg.

FMR: Vossa lavur per la Chadaina da Fortuna consista da la preparaziun per la rimnada, dal di da 18 uras da la rimnada senza e da l'elavuraziun suenter il di da collecta. Essas Vus anc adina motivada sco al cumenzament avant 16 onns?

Claudia Cathomen: Gea cler. Quai èn per mai ils pli bels dis tar RTR. Quai èn dis spetsials ordaifer la lavur da rutina. En mes entir engaschament per la Chadaina da Fortuna che cumpiglia tranter auter er visitas en ils territoris d'agid hai jau stuì emprender ch'igl è magari da bandunar l'atgna zona da confort e far il meglier or da la situaziun. Durant ils dis da collecta gaudi la bella atmosfera e la collavuraziun cun tut quellas persunas che vegnan voluntariamain per ans gidar en la centrala da telefon. La persvasiun da s'engaschar per ina buna chausa dat in bun sentiment a nus tuts en la centrala e nus empruvain da transferir questa atmosfera sin quels che fan las donaziuns.

Co è quai cun la generusadad da las Grischunas e dals Grischuns per la Chadaina da Fortuna?

Qua èsi da dir, che insatgi che ha pacis raps e dat ina pitschna summa è er fitg generus. Jau hai er gia telefonà cun ina persuna che na pudeva betg pli finanziar quai ch'ella aveva emprmess. Ella ha dentant già la buna voluntad e quai è er impurtant. Damai, nus survegnin grondas summas ed era main grondas, ma quai che fa plaschair è che la motivaziun da contribuir è tras e tras fitg gronda.

Datti in di da collecta che Vus tegnais en memoria spezialmain bain?

Quai è l'emprima acziun da rimnada il schaner 2005 suenter il Tsunami en l'Ozean Indic. La solidaritad da la populaziun suenter quella catastrofa da la natira era immensa. Er las summas da donaziuns per part fitg grondas han fatg ina gronda impressiun a mai. D'ina vart la dimensiun da la catastrofa e da l'autra vart la participaziun da la gliend.

Vus avais er gia visità cun la Chadaina da Fortuna pajais u lieus ch'èn vegni sustegnids cun daners ramassads durant ils dis da collecta. Tge impressiuns avais vus rimnà?

Jau hai visità trais terras che la Chadaina da Fortuna ha sustegni via organisaziuns d'agid.



Intervista per RTR cun il manader da project da la Caritas per bajegiar ina scola.

Jau sun per exempel stada a Haiti suenter il grond terratrembel dal 2010. Quai che jau na vegn mai ad emblidar èn ils munts da rument e merda dapertut, er en dutgs ed uals, sin e sper via. E las massas da gliend giuvna che gieva a pe. El Sudan dal sid hai jau entupà gist il cuntrari. Ins na veseva prest nagina gliend, v id era quai or sin la champagna. Il viadi avain nus fatg en jeeps, las vias eran ina pista da sablun cun bleras rusnas. Nus balantschavan sco en ina barca. U quai che jau na vegn mai pli ad emblidar en ils raquints dals abitants da Aceh, en la regiun dal Tsunami da l'Ozean Indic. Mintga persuna raquintava dad uffants, geniturs, frars, soras sparids. Nagin pudeva dir nua che quellas persunas èn, probablmain traguttidas da las undas giganticas da la mar. Istorgias nunditg impressiunantas e maletgs che han fatg e fan anc adina pel-giagliina a mai.

Co viagesch'ins sco gruppa svizra en regiuns da crisa sco per exempel en il Haiti ni en il Sudan?

A Bentiu en il Sidsudanais avain nus visità a la fin d'in viadi ina praschun ed in champ da fugitivs che la Chadaina da Fortuna ha sustegni via la Crusch Cotschna svizra. Nus avain fatg nossa lavur, avain discurre ed intervistà persunas ed a la fin avain nus vull turnar enavos en il nord dal pajais cun l'avion. I na dat nagina piazza aviatica, mo ina pista da sablun. Cura che noss avium è arrivà ha il pilot communitgà a nus ch'el haja plazza anc per trais persunas. Nus eran dentant tschintg persunas. Uschia ha la persuna da la Crusch Cotschna fatg telefons e pudì organisar per l'auter di in avium da transport da la UNICEF. Per fortuna. A Bentiu è nagut e restar là pli ditg senza forza electrica, senza

pudair bandunar noss motel da containers e betg savair cura che nus pudain turnar fiss stà stentus

Quai èn propi viadis da lavur e na da divertiment?

Quai è lavur e propi na luxus. Jau ma regord d'in hotel sin l'insla Sumatra en la Indonesia. La delegaziun da la Chadaina da Fortuna aveva reservà in hotel che aveva il num d'esser il meglier dal lieu. Jau na vules betg raquintar dal stan da l'igièna da questas chombras. Ils excrements pon ins anc nettegiar. Ma ils verms en l'aua da sa lavar na pon ins betg filtrar. Jau era simplmain fitg cuntenta d'avair in satg da durmir da saida cun mai per pudair giaschair sin la matratscha. Qua era schon bunmain luxus da pudair durmir en ina tenda en il camp da la Caritas a Bentiu en il Sudan.

Avant 75 onns ha l'emprima acziun da la Chadaina da Fortuna cumenzà cun ina rimnada per uffants. Venderdi proxim rimna la Chadaina puspè per uffants. Ils uffants èn in tema impurtant da las collectas?

Tenor la UNICEF moran mintg'onn tschintg milliuns uffants avant lur tschintgavel anniversari. E mintga quart uffant sin il mund patescha da fom, passa 16 milliuns uffants sut tschintg onns han fermamain sut pais. Uffants na pon betg sa dustar u èn savens sulets. Uffants vegnan malduvrats sco sclavs u per violenza sexuala. Lura datti uffants che van sin via. Ma er en Svizra datti uffants che han problems, gist uss en il temps dal coronavirus. Ils daners che nus rimnain cun la Chadaina da Fortuna van ad innovaziuns che sustegnan uffants en basegns.